

**NGO gesa Majlis Profesor Negara latih khalayak berfikir, bukan pertahan Najib**  
**The Malaysian Insider**  
**July 7, 2015**

Sebuah pertubuhan bukan kerajaan (NGO) hari ini menggesa Majlis Profesor Negara (MPN) melatih orang ramai berfikir dan bukan bertindak mempertahankan Datuk Seri Najib Razak secara semberono.

Presiden Gabungan Merdeka Rakyat, Mohd Ammar Atan membuat gesaan itu sebagai respons kepada desakan MPN supaya akses kepada laman web Wall Street Journal (WSJ) disekat susulan dakwaan yang dibuatnya terhadap perdana menteri.

"Kita wajib menuju ke hadapan meninggalkan kaedah kawalan dan tapisan tetapi memilih jalan pendidikan.

"Lebih baik memberi ilmu dan melatih rakyat berfikir dari cuba mengawal sumber bacaan rakyat yang pastinya akan terus gagal di zaman Internet ini.

"MPN harus terus maju ke hadapan dan jangan mundur ketinggalan zaman seperti katak bawah tempurung," kata NGO itu dalam satu kenyataan yang turut menyifatkan kenyataan MPN semalam sebagai "terdesak".

MPN semalam menggesa Najib memfailkan injunksi bagi menghalang WSJ daripada terus menyiarkan artikel mengaitkannya dengan dakwaan pemindahan wang RM2.67 bilion dari 1Malaysia Development Berhad (1MDB) ke dalam akaun peribadi beliau.

Saranan itu dibuat Ketua Kluster Pentadbiran, Perundangan dan Pengurusan Awam MPN, Profesor Dr Nik Ahmad Kamal Nik Mahmood yang berpendapat penyiaran artikel itu mencemarkan nama Najib dan pentadbiran negara.

"Najib perlu bertindak segera dengan mengemukakan saman dan permohonan injunksi mengarahkan penerbit tidak menerbitkan apa jua fitnah lagi terhadapnya," katanya seperti dipetik akhbar Sinar Harian.

Laporan sama turut memetik Nik Ahmad Kamal menyeru agar Suruhanjaya Komunikasi dan Multimedia (SKMM) menyekat akses kepada laman WSJ. – 7 Julai, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/ngo-gesa-majlis-profesor-negara-latih-khalayak-berfikir-bukan-pertahan-najib>